

可為此而特送諸將當俟聖節使馳報兼觀事勢為之可也貿易事令該司酌減可也判校亦當擇差○傳于三公曰近則氣候如常但因瘡口未合不得視事至為未安今則瘡口之合已過數月經筵視事當更見氣候而為之近來以不為閱武人不計軍令古人云安不忘危習陣閱武等事今亦可為但平復未久不可乘馬勞動故不為耳且近有惡獸出入城內可以命將驅逐然在世祖朝兼閱武親自為之且仁王白岳等山有惡獸亦親自驅逐云予意欲御慶會樓命左右廂一廂自馳駱山一廂自仁王山分陣合圍以觀用軍節次令角則近於文昭殿不可為也只以神機箭為之號令若有傳令之事則預先立馬於神武門外令宣傳官馳傳何如且都城有低微處故惡獸越入今可加築耶鄭光弼等回啓曰此事為之不妨但待上體永寧一二度臨群臣後為之何如城子令該司巡視加築何如傳曰知道○三公啓國諸虛竭今年亦有旱徵秋成難必自四月等祿減省然後國穀庶可儲蓄故前已啓之堂上官無所付祿者外其以下雜職自此等請勿填差傳曰依啓○夜東方北方巽方艮方有氣如火○辛巳吏曹啓曰昨日三公所啓知承文院事者莫如沈達源也漢語吏文皆通曉此人為判校甚